

# Nagin scumond da «foie gras» malgrà in pledoier farvent

## Importar products d'animals torturads resta lubì

■ **(anr/vi) Gnirom dad aucas torturadas dastgan ins vinavant importar en Svizra. Il cussegl dals chantuns ha refusà ier cun 34 cunter 4 vuschs in scumond. Il cussegl federal duai mo examinar ina obligaziun da declerar il product.** Per

tscherts gourmets èsi ina delicatessa, il dir u il gnirom dad aucas. Per ils protecturs d'animals èsi ina orrur. Las aucas vegnan engraschadas sfurzadamain per ch'ellas survegnian in grond gnirom. En Svizra èsi scumandà da producir „foie gras“. La specialitad vegn importada cunzunt da la Frantscha. Cusseglieier naziunal *Matthias Aebischer* (psl/BE) ha pretendì cun ina moziun in scumond da products dad animals torturads. Il cussegl naziunal aveva acceptà la moziun cun 97 cunter 77 vuschs e 17 abstenziuns.

Ier en la chombra pitschna n'ha l'intervenziun dentant chattà nagin'udida. Ils cussegliers dals chantuns han be approvà in postulat. Lez pretenda dal cussegl federal in rapport che examinescha ina decleraziun per imports che na correspundan betg a las normas da produenziun en Svizra.

In scumond d'import na pertutgass betg mo il foie gras, mabain era la bransch da textilas u dad uras che dovra per exempel tgirom per uras da bratsch.

### **Minder batta per ils animals**

Adumbatten ha *Thomas Minder* (senza partida/SH) appellà da dar suatientscha

a la moziun. Mintg'onn tractia il parlament intervenziuns encunter chommas-rauna, pels da reptilias u pels da focas ed adina tschentia il parlament l'economia sur il bainstar dals animals. La Svizra sco pajais bainstant stuess surpigliar il lead en la proteenziun d'animals. Pajais pli paupers na possian savens betg sa lubir dad introducir scumonds.

Gia tar las pels da focas novnaschidas haja il parlament ditg targlinà dad exprimer in scumond. La stgisa saja stada ils contracts internaziunals. Ma tals contracts prevedian adina era excepziuns che sa basian sin la morala publica. „Rauba producida cun torturar animals violescha exact questa morala“, ha punctuà Minder. Tar las pels da focas haja la WTO confermà ch'il scumond d'import saja confirm als contracts internaziunals.

### **Absurd ed inconsequent**

En Svizra saja quai scumandà da tegnair giaglinas en battarias e da castrar pors senza dierma. En l'EU n'existian betg tals scumonds. I saja absurd che ovs da talas giaglinas u charn-piertg dastgia vegnir importà mo cun ina decleraziun. Il parlament relaschia leschas inconsequentas. „L'atgna agricultura e las mazlarias enchargiain nus cun reglas severas, tar l'import serrain nus ils egl“, ha Minder critigà.